

永平府志（光緒）

一二

永平府志卷六十六

列傳十八 隱逸 耆壽 流寓 方伎

隱逸

(金)

趙質字景道遼相思溫之裔大定末舉進士不第隱居燕城南教授爲業明昌閒章宗遊春水過焉聞絃誦聲幸其齋舍見壁間所題詩諷詠久之賞其志趣非凡召至行殿命之官固辭曰臣僻性野逸志在長林豐草金鑣玉絡非所願也况聖明在上可不容巢由爲外臣乎上益奇之賜田千畝復之終身泰和二年

卒年八十五

金史

〔明〕

崔啓亨字建初盧龍人少孤撫於族祖家天啓甲子舉
於鄉庚午大清兵入郡城時

太宗皇帝延

攬賢才聞啓亨名授灤州牧啓亨堅辭

太宗

賜以乳酒十巨觥啓亨性不善飲至是連舉盡醉次

日不知所終

韓原濬字發之別號發西盧龍人御史應庚子應庚年
逾商瞿未舉丈夫子妻郝憂之聘於劉爲亞室是生
原濬幼而早慧父最愛之年十七父卒郝年已耄矣

劉佐持家秉御僮奴嚴而有則擇良師以傳子方是時海內無事縉紳之子席溫飽之餘蔭慮亡不呼鷹蹴踴追亟於狹邪之場甚且有傲其諸父伯舅者劉躬自督責一動止不少假以故濬折節讀書循循如寒士甫弱冠爲邑庠生後選入太學庚午之變劉度城不能守以五千金詣監軍犒師已而遍召族黨縱其所取僅以千金貽原濬俾出亡於外原濬泣不行母叱之曰若不念韓氏絕祀耶且母子俱死何益若行矣吾以死守門戶事平而母子無恙也原濬性至孝傷父早世每饋必奠而後食與人交坦坦無町畦

見人之有機事及談說人過失者面爲之赤曰天壤
聞吾不信有此事甲申神京陸沈謂其子鼎業曰吾
聞林慮可以避兵古之隱者多居之於是攜孥以行
所親者力勸之不爲阻或有問其故者笑而不應久
之遷鄆陵繼乃買田密縣結廬大驥山之麓而居焉
丙申冬卒於密縣年六十子鼎業奉骸骨還葬於其
祖墓側事訖歸耕於密從遺命也容城孫徵君嘗誌
其墓銘曰不雕不琢終身慕親謀不在食憂不在貧
鄉人以爲定論云

案鼎業字子新舊志無傳蓋以其遷居中州且當康
熙閒修志時其人尚在故未與立傳然其軼事見於

國初名家集中者甚著宋荔裳安雅堂集贈韓子
新歸中州詩云韓生何傲儻雅志慕田疇結交盡豪
俠座多荆聶流盧龍邁陽九鵲巢半爲鳩猛虎礪其
牙藻人如獵貔先幾貴明決盡室相與謀攀牽或徒
步不辭道路修始聞林慮好繼愛靈巖幽邑宰聞生
來下榻如南州鄰里聞生來饋糧貽耕牛空同沒百
載不能忘一杯金魚落人手白骨誰爲收生也具衣
冠馬鬣封遺止前年奉廣柳葬父南山頭謁余著麻
輓夷然無所求郡乘久零落感愴懷深憂山川風俗
書佐我恣窮蒐君家有釣臺樓榭與雲浮瞻言二三
子攜罿命輕舟垂竿發長嘯顧盼心悠悠今茲渡黃
河余亦將南輶哲兄棲會稽卓爾染鴻儒著書探宛
委未肯干諸侯平安未妨寄以我當置郵行行且造黃
廬庶幾一見不宋牧仲西坡類稿康對山墳被發詩
云盛明七子交最篤康對山與李崆峒李在羅網康
營救惡名何惜當時蒙此心久久益昭著千秋高義
傳無窮誰知兩公歸地下先後舉不保殯宮往者大
陽遭椎發遺骸委棄荆榛叢盧龍義士爲哭葬哀憤
幾欲呼蒼穹遍聞武功亦被禍黃腸拋擲郊原中自
注云大陽禹州山名崆峒葬處案二詩皆詠其葬李

崆峒事又案孫徵君年譜子新於順治十七年從夏
峯學康熙元年五月鹿忠節公孫從心客死武安山
中子新資其孤寡使得歸里夏峯晚年懷友詩有云
子新饒俠腸其慷慨之概經徵君稱許如此亦卓卓
永平一賢士也附錄於此以當傳略

尹樂堯字莘野灤州人庠生孝友和藹篤嗜古文典籍
環堵蕭然聲出金石冠蓋使雅重之不求聞達詩文
著作甚富自稱平灤蟻士

倫浹字元谷灤州人癖嗜典籍寢食沈酣尤精濂洛性
命之學出緒餘爲詞賦古文澹永凝秀如昌黎次山
入躡棘闈以明經隱居卒貽封御史入鄉賢祠所著
有元谷一冊

王柚字飫寰灤州人都御史鎬之孫舉人渝之子性澹
紛華清真無欲經史過目成誦尤專廿一史凡年月
字號問答如流家貧絕粒嘯咏自若明經不仕以布
衣終焉

倫之模字五全灤州人夷懿天貺敬身誠物事親養志
曲盡其禮以明經司訓順天薦紳肅榻丁內艱歸值
鼎革力辭徵檄有兩冀高風焉年七十三歲卒

張失其灤州人庠生工部正郎鵬翼孫也少穎異弱冠遊庠平生著作甚富遇甲申之變卽自銅一室命家人穴壁以進飲食五十餘載形影相依雖骨肉莫能覩其面者自寫小照及心而止並題五律云圖形期自見自見卻傷神已是夢中夢更逢身外身筆花凝幻質墨彩聚空塵堪笑吾兼爾同爲未了人壽七十餘卒

國朝

高輔辰字欽亮灤州人人稱二亮先生晚自號南村病人登崇正癸未進士初任安陽令入本朝催補范

縣未幾以病辭兩臺固留分校酉闌三謝不赴始奏
回籍後屢徵不起徧遊恒岱江楚交識海內名宿家
食優游不問生產所著存熙堂稿纂集雜俎若干卷
卒年七十五

劉允元字虞卿山海諸生通經史工辭翰善草書淡泊
自適不求聞達隱居城西劉家莊生於明萬曆四十
二年卒於國朝康熙十一年

衛鈍字玉鏘灤州人庠生醇謹篤行不苟言笑與人交
接藹然可親家赤貧饔飧不給宴如也性愛山水及
奇花異草忘懷得失殆有陶靖節之風云

耆壽

明

溫欽樂亭人性篤實與人無競非公罕至城市貧而樂善卓有古人風年至百有餘歲嘉靖間扁其名於旌善亭

李宗儒樂亭人霖季子純謹誠慤勤勵好學時伯仲間相繼登科第儒溫恭抑抑略無矜炫色貢入太學授林縣丞未幾解組歸禔躬爲鄉邑望者幾四十年嘉靖閒扁其名於旌善亭年九十七卒子汝紹官太醫院

院

田宗周昌黎人三任廣文賦性仁厚接人謙謹儼然有
道遺風司李尤侗贈扁曰人師國老享年九十有六
趙秉貴字天爵樂亭人少時安貧守分勤儉自持中歲
家漸豐而衣麤食淡以之終身年九十餘鬚髮微蒼
猶健步如少壯時生於康熙五十三年二月卒於嘉
慶十八年十一月壽百歲

李棵椿昌黎人素有至性母病徧訪古今書診之不效
因剗股肉投藥中以進母尋愈後椿享壽八十餘值
康熙萬壽蒙 恩赴千叟宴 賞給布帛

楊時盛字茂林臨榆人性狷介行無所苟年八十餘歲貢授邯鄲訓導九十告歸舉鄉飲大賓初鄉試入都表兄房某謂若主我交通關節功名可立得時盛甚惡之不履其門及在邯鄲子度年五十而鰥有遊宦之妾新寡無子美而多財欲嫁之度稟命大怒不食亦不言度懼而請罪事遂寢卒年九十二時康熙四十七年

司永魁遷安人武庠生性嚴正排難解紛戒賭博息爭訟終其世鄉中無遊手者壽至九十二無疾而終

田士傑字邁萬昌黎人五世同堂壽九十七而卒生平

好施拾金不昧里人以善稱焉

閻汝幹字盡臣樂亭人性篤厚家貧棄儒爲醫八十一

歲 仁宗東巡

賜九品頂戴銀牌至八十

三歲卒子九富亦習岐黃享年八十餘孫桐年今已
九十歲猶康強三世耆壽亦家慶也曾孫開第沛霖
元孫鳳文皆入郡庠

趙廷桂遷安人壽九十二以鍼灸濟人五世同堂外如
張紀壽九十六蔡向榮壽九十一楊端壽九十滿裕
倉壽七十七俱五世同堂劉保王明志俱壽九十五
蔡省山庠生高義魁武庠生俱壽九十七張達壽九

十八朱成龍壽九十六耿自仁壽九十八子有年壽
八十八尙壯健一門壽考允稱熙朝人瑞焉又卜
禹壽八十一七世同居

趙景明撫甯人年九十七歲弟光明九十四歲冊明九
十一歲康熙甲子邑侯趙端題同胞三老四字贈之
後景明壽百有十歲餘皆臻百歲

趙夔龍撫甯人兄弟同居樂舉善緣年登八十子孫多
遊庠序鄉人重之

惠文俊撫甯人由吏員任海甯大使清慎老練士民德
之居鄉好禮巡撫扁旌曰雅操高風享年八十四

徐應虎撫甯人性耿介尙義樂施本縣綱扁曰一鄉善士

山石道呂扁曰德壽軼倫

張敬銘撫甯人尙義急公孝友信果壽享耄耋本縣扁

曰德副輿情

徐麟祥撫甯人歲貢生年七十居父喪依然孺慕名其
齋曰爲善最樂又刻忍讓敬恕於堂人皆稱爲有道
邑侯張公奎祥贈純嘏是常扁八十初度邑侯莊公
學愈贈德厚天全扁郡守梁公錫蕃贈盛朝人瑞扁
韓晉字進也樂亭人幼補弟子員賦性溫良居心孝友
乾隆元年恩賜入品頂戴壽八十五終